



**Mahein Nia Lian no. 20, 30 Maiu 2011**

## **PNTL nia Profesionalismu Sukat iha Atuasaun**

### **Introdusaun**

Hare ba politika siguransa nasional nebe hatur iha prinsipiu sanulu nudar matadalan ba siguransa nasional. Iha prinsipiu sanulu ne'e, premeiru no sigundu prinsipiu deskrebe katak; *premeiru* politika siguransa nasional respeita no hatama valor sira nebe ita hahi ba siguransa nasional. Ita nia siguransa nasional tenki promove direitus humanus, lei no ordem, governasaun nebe lejitimu ho responsabilidade, justisa, liberdade, toleransia no fo oportunidade hanesan ba ema hotu. *Sigundu* ita fiar katak "diak liu Prevene duke Kura" politika siguransa nasional fiar katak diak liu prevenensaun molok ameasa mosu no sai boot liu.<sup>1</sup>

Polísia Nasionál Timor-Leste (PNTL) forsa siguransa ida ne'ebé iha Misaun atu defende legalidade demokrátiku, garante siguransa sidadaun, bens nian no proteje direitu sidadaun nian tuir termu ne'ebé estabelese iha Konstituisaun no iha Lei oan sira. Tuir estratéjia no filozofia polisiamentu nian PNTL iha karakteristika polísia komunitária, maske nia organizaun, disiplina, instrusaun no estatutu pesoál nian sei tuir natureza militar, PNTL sei la konstitui forsa natureza militar ida.<sup>2</sup>

### **Atuasaun Polisia Nasional Timor Leste (PNTL)**

Konkista boot iha prosesu reforma setor siguransa nebe lori hikas konfiansa ba PNTL atu responsabliza siguransa iha teritoriu tomak Timor-Leste, hafoin UNPOL entrega poder ba Polisia Nasional Timor-Leste iha loron 27 Marsu 2011, aniversariu PNTL. Fundasaun Mahein (FM) hare katak progresu boot iha prosesu reforma ida ne'e, maske sei iha limitasaun oi-oin maibe esforsu tomak hodi hetan hikas konfiansa. Konfiansa nebe instituisionalmente hala'o lei no ordem nudar ordem konstituisional no operasionalmente estabiliza situasaun ba iha perturbasoens ordem publika. Maibe iha

---

<sup>1</sup> Edisaun 1. Seguransa: Media informassaun no Komunikaun Sekretaria Estadu ba Siguransa. Outubru 2010.p15

<sup>2</sup> Numeru 1 no 2, artigu 1. Lei Organika Polisia Nasional Timor Leste. 2009

operasaun atu estabiliza situasaun iha sirkuntansia hotu-hotu presiza mos respeita valor no regra nebe'e hatur iha estadu direitu demokratiku.

Tuir Komadante Jeral PNTL Komisarius Longuinhos Monteiro katak Intervensaun ba orden publiku husi PNTL, iha ninia prosedimentu rasik. Polisia la halo intervensaun arbiru ba asaun ruma ne'ebe mosu iha comunidade nia leet. Polisia halo atuasaun tuir eskala husi problema ne'ebe mosu. Karik problema ne'e mosu ho violensia, entaun polisia obrigatoriamente uza forsa.<sup>3</sup> Fundasaun Mahein (FM) hare katak bele ka lae uza forsa hanesan solusaun ba problema no konflitu? Maibe dalabrak iha atuasaun elementu PNTL balu hamosu violasaun ka torturasaun ba comunidade.

### **Atuasaun ba problema Rai no Uma Komunitade nian**

FM nia hare ba asaun nebe lansa iha atuasaun elementu Polisia Nasional Timor-Leste (PNTL) nebe durante ne'e comunidade no publiku kestiona katak iha violasaun no torturasaun. Grave tebes elementu Polisia halo atuasaun trata hanesan nia inimigu. Aktus hirak ne'e ita konsidera hanesan aktu indisciplina tamba ne'e presiza toma atensaun husi Komandu PNTL ba elementu indisciplinadu sira.

Atuasaun Polisia Nasional Timor-Leste (PNTL) ba Uma no rai comunidade nia iha Bairro-Pite (eis Kazerna Brimob) FM hare ne'e grave tebes tamba atuasaun PNTL iha momentu neba rezulta vitima ida kanek no comunidade psikolojikamente trauma tamba prejsa elementu PNTL halo atuasaun iha tuku hat madrugada.<sup>4</sup> Tuir Lucio Savio husi Fundasaun Haburas konsidera atuasaun Polisia nian iha momentu neba hanesan ilegal tamba la respeitu direitu comunidade nian no viola Konstituisaun RDTL, ne'e sorin ida.<sup>5</sup>

Iha sorin seluk, tuir Diretor Fundasaun Haburas Demetrio do Amaral de Carvalho katak aprosimasaun ba comunidade iha mos membru PNTL balun hola parte, aprosimasaun membru PNTL balun ba individu balun hodi fo osan kompensasaun entre US\$.2000.00 to'o US\$. 2500.00, aprosimasaun ne'e rasik la tuir boa governasaun tamba ema balun simu iha uma, iha dalan, iha restorante no balun simu koa ka hamenus tiha nia kuantidade husi total nebe tuir lolos tenki selu ba comunidade sira.<sup>6</sup> Fundasaun Mahein (FM) hare katak husi aprosimasaun elementu Polisia balu iha indikasaun manipulasaun no violasaun ba direitu comunidade nian nebe ita bele hare husi numeru osan nebe fo sai. Tamba ne'e FM husu ba Komando Polisa Nasional Timor-Leste nesesariamente halo investigasaun ba aktu hirak ne'e tamba bele hafoer imajen instituisaun PNTL iha comunidade nia leet.

<sup>3</sup> <http://www.suara-timor-lorosae.com/berita-3714-violensia-fo-dalan-ba-polisia-uza-forsa.html>

<sup>4</sup> Entrevista Staf Fundasaun Haburas. Lucio Savio. Kuarta, 27 Abril 2011

<sup>5</sup> Entrevista Staf Fundasaun Haburas. Lucio Savio. Kuarta, 27 Abril 2011

<sup>6</sup> Paper Uma ba comunidade nebe digno no saudavel Ekologikamente. Demetrio do A. De Carvalho. 27 Abril 2011

Iha Distritu Manufahi atuasaun PNTL ba rai komidade nia iha Suku Holarua atu halo edifisiu Polisi Distritu Manufahi nian. Tuir Pedro Nunes komidade Suku Holarua konsidera atuasaun Polisia nian iha fatin refere hanesan tama husi janela no la iha kuinesementu ba Lider Komunitaria. No pior liu tan Polisia ho forsa deit ba dada fita iha rai komidade nian nebe atu halo edifisiu PNTL Distritu Manufahi, tuir komidade katak tuir lolos Agraria mak mai sukat rai maibe nusa Polisia ho forsa deit mai dada fita iha ami nia rai no la iha konesementu ruma ba komidade.<sup>7</sup> FM hare katak ne'e grave tebes wainhira elementu Polisia balun halo atuasaun tuir nia hakarak no ameasa komidade katak komidade mak lori kazu ne'e ba tribunal mak manan entau koa tiha elementu ne'e nia tilun, ne'e sorin ida. <sup>8</sup> Iha sorin seluk aktu ida ne'e la respeita direitu komidade nia satan elementu polisia tun dereitamente sukat rai tuir lolos poder Dirasaun Nasional Terras no propiedade mak halo kanar ida ne'e.

### **Gravasaun konaba PNTL nia Atuasaun....**

#### *1. Kazu Delta Nova 29 Dezembru 2009*

Kazu Delta Nova nebe rejulta vitima Valdir Cesar do Nascimento Lebre aliás Kuka nebe deskonfia husi vala Pistola elementu PNTL balu iha Salaun Delta Nova Komoro, loron 29 Dezembru 2009.<sup>9</sup> FM hare katak kazu ida ne'e besik tinan rua ona maibe la iha investigasaun nebe profundu ba aktu krimi ida ne'e no se los sai hanesan autor ba kazu ne'e hodi hamate vitima. No kazu ida ne'e reazen makas husi Prezidenti Republika no ejiji nafatin justisa ba kazu ida ne'e hodi hatan iha tribunal.

#### *2. Kazu Subdistritu Uatolari, Suku Vessoru 04 Janeiru 2010*

Iha tinan 2010 elementu PNTL Sub-distritu Uatolari (Viqueque) halo torturasaun ba joventude iha suku Vessoru, aldeia Baha'o, tuir vitima katak sira la hatene buat ida derepentin deit Polisia to'o no taka metin oin hanesan *Ninja*, nune'e mos tuir vitima katak hafoin baku, tuku, tebe hotu Polisia husik hele tiha sira maibe sira la hatene saida mak sira halo sala.<sup>10</sup> Tuir Afonso Soares porta voz ba joventude vitima nebe hetan torturasaun husi elementu Polisia katak kazu ne'e sira hato'o ona Provedoria direitus Humanus no Justisa (PDHJ), Parlamentu Nasional, Komando Polisia Nasional Timor-Leste (PNTL) maibe to'o agora seidak iha rezultadu investigasaun ruma ba asaun nebe komete husi elementu polisia hirak ne'e.<sup>11</sup> Fundasaun Mahein (FM) hare katak atuasaun elementu polisia ida ne'e grave tebe-tebes wainhira polisia halo an hanesan Ninja satan halo atuasaun ho violasaun no torturasaun iha tempu kalan no husik hela

<sup>7</sup> Entrevista komidade Same Holarua. Pedro Nunes. Kuarta, 27 Abril 2011

<sup>8</sup> Entrevista komidade Same Holarua. Pedro Nunes. Kuarta, 27 Abril 2011

<sup>9</sup> <http://temposemanaltimor.blogspot.com/2010/12/prezidenti-horta-ezije-justisa-ba-kazu.html>

<sup>10</sup> Entrevista Alarico Pinto. 03 Maiu 2011

<sup>11</sup> Entrevista Afonso Soares. 03 Maiu 2011

vitima. No vitima rasik la hatene saida mak sira halo sala, karik ida ne'e iha motivu privadu ruma ba joventude sira? Ate agora vitima sira ejji nafatin ba autoridade kompotenti hodi halo investigasaun no publika sai saida mak sira komete hodi polisia ba asaltu sira, iha sira nia uma rasik. Tamba ne'e Fundasaun Mahein husu Komandu PNTL atu halo investigasaun nebe klean no fo sai nia rejultadu ba vitima sira. Tamba tuir vitima sira katak tenki iha justisa ba kazu ida ne'e.

### *3. Kazu Hudi Laran-Dili*

Konflitu grupu arte marsiais nebe oras ne'e dadauk sai hanesan ameasa ba estabilidade ba comunidade nian tamba ne'e presija tebes prejensa Polisia atu halo atusaun ba aktu violentu hirak ne'e. Maibe tuir comunidade Hudi Laran katak asaun Polisia nian hodi halo prevensaun ba problema iha terenu hanesan fali halo propaganda (soran) fali povu sira no hatauk povu ho kilat.<sup>12</sup> FM hare katak kanar Polisia nian atu implementa lei no ordem maibe wainhira lansa fali propoganda ka soran comunidade no ameasa comunidade ho kilat<sup>13</sup>. Ne'e grave tebes ba instituisaun nebe mantein lei no ordem iha estadu direitu demokratiku ida ne'e, signifika elementu polisia balu halimar no viola ona lei no ordem nebe tau iha nian kabas no la obdese ona ba lei nebe regula konaba atusaun polisia nian ba problema nebe akontese.

### *4. Kazu elementu CSP ho Jornalista TVTL iha Parlamentu Nasional*

Elementu PNTL balu husi Companha Seguransa Pessoal (CSP) ameasa Jornalista husi Televizaun Timor Leste (TVTL) iha Parlamentu Nasional. Tuir Almerio dos Santos Jornalista TVTL katak wainhira sira halo kobertura iha Palacio do Governo hakat liu mai iha Parlamentu Nasional halo kobertura no lori ekipamentus tau iha pasta, membru polisia feto ida haruka ami sai tamba lori pasta tama Parlamentu Nasional ami kumpri duni hodi rai pasta iha liur, maibe wainhira foti filmajen ami hetan ameasa husi Polisia-CSP atu baku rahun kamera.<sup>14</sup> Fundasaun Mahein (FM) hare katak ne'e grave tebes tamba media hanesan komponenti importante ida iha natureza demokrasia nebe bele garantia liberdade, dezenvolvimentu no habelar informasaun ba sociedade tomak iha estadu direitu demokratiku hanesan Timor-Leste. Fundasaun Mahein (FM) konsidera aktu ida ne'e bele hamate valor demokrasia no direitus humanus no viola lei nebe hatur iha Konstituisaun Republika Demokratika Timor-Leste.

### *5. Kazu elementu PNTL halo torturasaun iha Bekora*

Oknum PNTL iha Bekora halo torturasaun ba vitima Lucio Neves Correia nebe la iha motivu nebe klaru no iha altura ida ne'e hetan reazen makas husi representante povu

---

<sup>12</sup> Timor Post. Kuarta, 26 Janeiru 2011

<sup>13</sup> Diariu Nasional. Kinta, 27 Janeiru 2011

<sup>14</sup> Jornal Diario Nasional. Segunda, 21 Marsu 2011

iha Parlamentu Nasiona<sup>15</sup>. Fundasaun Mahein (FM) hare katak aktus indisciplinadu ida ne'e presija toma atensaun no hatun sansaun administrativu no disiplinir ruma ba aktu hirak ne'e. Tamba ne'e hodi justifika motiva husi kazu ida ne'e no impaktu nebe rejulta vitima husi atusaun ida ne'e.

#### 6. *Elementu Polisia husi BOP halo torturasaun ba komidade iha 22 Abril 2011*

Nune'e mos elementu Polisia balu husi Batailiaun Ordem Publiku (BOP) halo torturasaun ba Jose Tolan iha 22 Abril 2011 kalan iha Tasi Tolu nebe rejulta vitima kanek todan iha nia ulun. Iha altura ida ne'e elementu Polisia ne'e ho ropa sivil maibe lori pistola hodi ameasa atu tiru mate familia vitima no komidade nebe hela besik iha area neba.<sup>16</sup> Fundasaun Mahein (FM) hare katak ne'e pior liu wainhira elementu polisia ida ho roupa sivil lori pistola hodi ameasa komidade. Grave liu tan uza sasan povu nian hodi ameasa fali povu nebe na'in ba sasan hirak ne'e. Tamba ne'e Fundasaun Mahein (FM) husu katak iha ka lae lei ka regulamentu ruma nebe regula konaba uza ekipamentus hanesan pistola wainhira elementu polisia ida lori pistola iha liur fora horas servisu?

#### **Atusaun PNTL no Grupu Ilegal**

Grupu ilegal iha Distritu Manufahi ho naran Xefe Estado Maior Baze Apoiu 1975 husi Komadante Lakon Mosu, ameasa populasaun sira bainhira halo kobransa ilegal iha Subdistritu Same, Distritu Manufahi.<sup>17</sup>

Husi grupu ilegal mosu mos kobransa ilegal ba komidade. Grupu ilegal deskuinesidu nain 13 sai autor hodi kontinua halo kobransa ilegal inklui hato'o informasaun falsu ba povu sira iha Distritu Manufahi hodi involve iha grupu refere.<sup>18</sup> FM hare katak ida ne'e iha risku boot ameasa ba estabilidade iha Timor-Leste wainhira Polisia la halo atusaun nebe nesesariu no atusaun nebe preventivu, ne'e sorin ida. iha sorin seluk FM hare katak grupu ilegal no kobransa ilegal mosu tamba polisia la iha kordenasaun ho komidade, liu-liu polisia komunitaria nebe hala'o nia kanar hela hamutuk ho komidade, servisu hamutuk ho komidade, dialogu ho komidade no nunka hatene problema saida mak komidade infrenta. Tamba ne'e iha potencia boot bele mosu grupu ilegais no aktividade ilegais.

#### **Atusaun PNTL no ema mate oho husi grupu deskuinesidu**

<sup>15</sup> Suara Timor Lorosa'e. Kuarta, 13 Abril 2011

<sup>16</sup> Jornal Nasional Diario. Kuarta. 27 Abril 2011

<sup>17</sup> Timor Post. Kuarta, 16 Feveireiru 2011

<sup>18</sup> Timor Post. Sexta, 28 Janeiro 2011

Akontesementu 23 Janeiru 2011 iha Subdistritu Quelecai, Distritu Baucau nebe rejulta Celestinho Sarmiento mate tamba vitima oho husi grupu deskuinesidu.<sup>19</sup> FM hare katak asaun nebe lansa husi grupu deskuinesidu, iha risku boot bele aumenta ba bebeik. Tamba atusaun polisia durante ho modelu kurativu deit no polisia hela deit iha nia edifisiu nunka hakbesik ba comunidade no rona deit keisa husi comunidade atu halo atusaun maibe la hatene kauza husi problema nebe akontese no ikus hare deit nia impaktu nebe rejulta vitima mate oho husi ema deskuinesidu.

Kazu hanesan nebe rejulta vitima mate no oho husi grupu deskuinesidu akontese iha 17 Janeiru 2011 iha area Komoro Distritu Dili, nebe rejulta vitima Agostinho mate nebe oho husi grupu deskuinesidu.<sup>20</sup> Nune'e mos iha Bidau-Toko Baru iha Sabadu, 26 Marsu 2011 madrugada tuku 02.00 Otl, nebe rejulta vitima Jose Antonio de Carvalho mate oho husi ema deskuinesidu.<sup>21</sup> Inklui mate isin ho naran Laelita Matilde nebe Polisia hetan iha 12 Feveireiru 2011 nebe deskunfia oho husi ema deskuinesidu iha area Komoro.<sup>22</sup> Fundasaun Mahein hare katak ne'e grave tebes husi asaun nebe lansa husi grupu deskuinesidu, tamba ita hare husi akontesementu hirak nebe lansa iha fulan Janeiru 2011 to'o Marsu 2011 kuaze husi ema deskuinesidu nebe rejulta vitima mate husi grupu deskuinesidu nian aktus. Tamba ne'e Fundasaun Mahein (FM) husu ba Komando Polisia Nasional Timor-Leste liu husi Komando Distritais no Eskuadra sira hakbesika ba comunidade, dialogu ho comunidade hodi hatene problema nebe comunidade infrenta nudar modelu ida atu prevene asaun nebe lansa husi grupu deskuinesidu. Liu-liu kanar polisia komunitaria fortetika liu tan nudar deskreve iha Politika Siguransa Nasional prinsipiu segundu katak diak liu prevene duke kura.

## **Konkluzan**

Husi atusaun elementu polisia no asaun nebe lansa husi grupu deskuinesidu Fundasaun Mahein (FM) hare katak nesesariamente hametin servisu polisia komunitaria iha sirkuntansia hotu-hotu liu-liu hakbesik an ba comunidade. No hametin relasaun entre polisia no comunidade nudar parseiru la'os trata hanesan inimigu, ne'e sorin ida.

Iha sorin seluk haklean konesementu elementu polisia nian ba direitus humanus, lei no prosidimentu seluk nebe hatur iha natureza polisiamentu. Fundasaun Mahein (FM) hare katak iha atusaun elementu polisia, publiku no comunidade sempre kistiona konaba atusaun nebe lansa husi polisia nebe dalabarak iha violasaun no torturasaun.

---

<sup>19</sup> Jornal Diario Nasional. Kuarta, 03 Feveireiru 2011

<sup>20</sup> Jornal Diario Nasional. Sexta, 21 Janeiro 2011

<sup>21</sup> <http://suara-timor-lorosae.com/berita-3909-kazu-oho-jose-carvalho-ih-bidau-toko-baru-familia-ejji-polisia-kaptura-suspeitu.html>

<sup>22</sup> Timor Post. Kuarta, 16 Feveireiru 2011

Nune'e mos Fundasaun Mahein (FM) hare katak haforsa tan atuasaun nebe preventivu atu nune'e bele prevene asaun nebe ameasa ba estabilidade. Tamba povu atu goza dezvoltimentu nebe la'o dadauk importante tebes estabilidade no povu senti seguru iha nia hela fatin. No ikus liu Fundasaun Mahein (FM) husu ba Komando Polisia Nasional Timor-Leste (PNTL) obrigatoriamente hato'o ba elementu polisia sira tenki obdese ba lei no regulamentu sira nebe konsagra ona.

**Fontes:**

Edisaun 1. Seguransa: Media informassaun no Komunikasaun Sekretaria Estadu ba Siguransa. Outubru 2010.p15

Numeru 1 no 2, artigu 1. Lei Organika Polisia Nasional Timor Leste. 2009

Paper Uma ba comunidade nebe digno no saudavel Ekologikamente. Demetrio do A. De Carvalho. 27 Abril 2011

### **Jornal**

Suara Timor Lorosa'e. Kuarta, 13 Abril 2011

Jornal Nasional Diario. Kuarta. 27 Abril 2011

Jornal Diario Nasional. Segunda, 21 Marsu 2011

Timor Post. Kuarta, 16 Feveiru 2011

Timor Post. Sexta, 28 Janeiro 2011

Jornal Diario Nasional. Kuarta, 03 Feveiru 2011

Timor Post. Kuarta, 26 Janeiro 2011

Timor Post. Kuarta, 16 Feveiru 2011

Jornal Diario Nasional. Sexta, 21 Janeiro 2011

### **Intervista**

Afonso Soares. Porta Voz Vitima nian. Dili 03 Abril 2011

Alarico Pinto. Vitima . 03 Abril 2011

Intervista comunidade Same Holarua. Pedro Nunes. Kuarta, 27 Abril 2011

Intervista Staf Fundasaun Haburas. Lucio Savio. Kuarta, 27 Abril 2011

### **Links:**

<http://temposemanaltimor.blogspot.com/2010/12/prezidenti-horta-ezije-justisa-ba-kazu.html>

<http://www.suara-timor-lorosae.com/berita-3714-violensia-fo-dalan-ba-polisia-uza-forsa.html>

<http://suara-timor-lorosae.com/berita-3909-kazu-oho-jose-carvalho-iha-bidau-toko-baru-familia-ejiji-polisia-kaptura-suspeitu.html>